

227.

Na osnovu člana 17. Zakona o Vladi Unsko-sanskog kantona ("Službeni list Unsko-sanskog kantona", broj 2/97, "Službeni glasnik Unsko-sanskog kantona", broj 3/2000, 5/2000, 3/2003 i 20/2004), a u vezi sa članom 123. stav 3. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", broj 39/03 i 22/06) i po prijedlogu Kantonalne uprave civilne zaštite, Vlada Unsko - sanskog kantona, na sjednici održanoj dana 27.6.2007. godine, donosi

UREDBU**O NAČINU ORGANIZOVANJA SLUŽBI
ZAŠTITE I SPAŠAVANJA UNSKO-
-SANSKOG KANTONA****I - OSNOVNE ODREDBE****Član 1.**

Ovom Uredbom određuju se pravna lica i udruženja građana u kojima se organizuju službe zaštite i spašavanja koje će djelovati na području Unsko-sanskog kantona (u daljnjem tekstu: Kanton), utvrđuju zadaci tih službi i uređuju druga pitanja od značaja za organizaciju i rad tih službi.

Član 2.

U cilju stvaranja uvjeta da se u svim slučajevima nastanka prirodne ili druge nesreće na bilo kom dijelu područja Kantona može obezbijediti odgovarajuća zaštita i spašavanje ljudi i materijalnih dobara, formiraju se službe zaštite i spašavanja na nivou Kantona.

U skladu s ciljevima iz stava 1. ovog člana, a prema Procjeni ugroženosti Unsko-sanskog kantona od prirodnih i drugih nesreća, koja je usvojena Odlukom o Procjeni ugroženosti Unsko-sanskog kantona od prirodnih i drugih nesreća broj 03-017-1446/05 od 8.3.2005. godine (u daljnjem tekstu: Procjena ugroženosti Kantona), na nivou Kantona potrebno je formirati službe zaštite i spašavanja samo u oblastima u kojima općine, zbog nepostojanja uvjeta, ne mogu formirati te službe ili ne mogu formirati dovoljan broj tih službi.

Službe zaštite i spašavanja iz stava 1. ovog člana formiraju se u pravnim licima i u udruženjima koja ispunjavaju slijedeće uvjete:

- 1) da je njihova djelatnost ili dio djelatnosti takve vrste koja je od značaja za zaštitu i spašavanje ljudi i materijalnih dobara od prirodnih i drugih nesreća,
- 2) da imaju stručne kadrove i odgovarajuću opremu, tehnička i druga sredstva koja omogućavaju vršenje poslova iz nadležnosti službe zaštite i spašavanja,
- 3) da imaju mogućnost pružiti ispomoć službama zaštite i spašavanja koje formira općina i grad kada se naredi njihovo angažovanje na tim zadacima.

Član 3.

Službe zaštite i spašavanja predviđene ovom Uredbom namijenjene su da djeluju na području cijelog kantona, u svim slučajevima kada službe zaštite i spašavanja i jedinice i druge organizovane snage civilne zaštite općine i grada na čijem području je nastala prirodna i druga nesreća nisu dovoljne da brzo i efikasno izvrše sve zadatke na zaštiti i spašavanju ugroženih ljudi i materijalnih dobara u odnosu na poslove za koje su nadležne te službe, a u skladu sa naredbama Kantonalnog štaba civilne zaštite (u daljnjem tekstu: Kantonalni štab).

**II - PRAVNA LICA I UDRUŽENJA
GRAĐANA U KOJIMA SE ORGANIZUJU
SLUŽBE ZAŠTITE I SPAŠAVANJA****Član 4.**

Polazeći od kriterija iz člana 2. ove Uredbe, službe zaštite i spašavanja na nivou Kantona organizuju se u slijedećim pravnim licima i udruženjima, i to:

1. **Služba za medicinsku pomoć** formira se u JU "Kantonalna bolnica dr. Irfan Ljubijankić".

Služba za medicinsku pomoć vrši poslove zaštite i spašavanja kada prirodna i druga nesreća izazove velike gubitke u ljudstvu s velikim brojem povrijeđenih, koje prevazilaze kapacitete lokalnih zdravstvenih ustanova. U tim slučajevima, ta služba vrši poslove koji se odnose na pružanje usluga specijalističko-konsultativne zdravstvene zaštite, koja obuhvata zdravstvene usluge u slučaju urgentnih stanja, pruža hitnu stručnu i organizovanu medicinsku pomoć povrijeđenim ili naglo oboljelim licima, vrši laboratorijsku, radiološku i drugu dijagnostiku, opskrbu

lijekovima, krvlju, krvnim komponentama, te hospitalizaciju teško oboljelih i povrijeđenih.

2. **Služba za higijensko-epidemiološku zaštitu** formira se u JU "Zavod za javno zdravstvo USK-a".

Služba za higijensko-epidemiološku zaštitu vrši poslove prikupljanja i statistički obrađuje podatke o zdravstvenom stanju na području Kantona, kontrolira, prati i analizira epidemiološku situaciju na području Kantona, predlaže i provodi protuepidemijske mjere, te nadzire provođenje obaveznih imunizacija, kontrolira higijensku ispravnost vode za piće, površinske i otpadne vode, zdravstvenu ispravnost namirnica i predmeta opće upotrebe, vrši analize i ocjenu uticaja okoliša po zdravlje ljudi i druge poslove koji izravno ugrožavaju zdravlje većeg broja lica, što na terenu prate odjeljenja higijensko-epidemiološke zaštite pri domovima zdravlja općina.

3. **Služba za zaštitu životinja i namirnica životinjskog porijekla (Veterinarska služba)** formira se u JU "Veterinarski zavod" Bihać.

Veterinarska služba vrši poslove koji se odnose na terensku i laboratorijsku dijagnostiku zaraznih, parazitnih i drugih oboljenja životinja. Prati, istražuje, unapređuje i primjenjuje metode otkrivanja, suzbijanja i prevencije zaraznih, parazitnih i drugih oboljenja životinja, planira i predlaže mjere dezinfekcije, dezinfekcije i deratizacije radi sprečavanja, širenja i suzbijanja zaraznih oboljenja životinja. Vršiti istraživanje i praćenje zaštite od zoonoza, prati, analizira i ocjenjuje uticaj okoliša na zdravstveno stanje životinja, obavlja laboratorijske pretrage proizvoda životinjskog porijekla, kao i prisustvo radioaktivnih materija na i u životinjama, mesu, mlijeku i proizvodima životinjskog porijekla, te hrani i vodi za životinje. Veterinarska služba vrši i druge poslove zaštite i spašavanja iz oblasti veterinarstva na području Kantona u saradnji sa veterinarskim stanicama.

4. **Služba za zaštitu i spašavanje na vodi i pod vodom** formira se u sklopu sportskih klubova i udruženja registriranih na području Kantona koji se bave sportovima i aktivnostima na vodi i pod vodom, koje čine: Kajak-kanu rafting klub "Kostelski buk" Bihać, Ronilački klub "Vir-Sana" Sanski Most i Ronilački klub "Slap" Bosanska Krupa.

Službe za zaštitu i spašavanje na vodi i pod vodom vrše poslove spašavanja ljudi i materijalnih dobara na vodi i pod vodom. Vršiti prevoz i evakuaciju nastradalih u poplavljenom području, vade utopljenike i vrše uklanjanje plutajućih objekata na vodi i neeksplozivnih ubojnih sredstava pod vodom, sudjeluju u saniranju akcidentnih stanja pri ekološkom onečišćenju riječnih tokova. Sve poslove zaštite i spašavanja na vodi i pod vodom službe vrše prvenstveno kada je potrebno izvršiti masovnu evakuaciju stanovništva ugroženog vodenom stihijom, prilikom pružanja specijalističke pomoći općinama kod pojedinačnih nesreća na vodi i pod vodom, na saniranju stanja prirodnih i drugih nesreća i akcidentnih ekoloških stanja izazvanih poplavama.

5. **Služba za zaštitu sa visina** formira se pri Gorskoj službi spašavanja, Stanica Bihać, registriranoj kao udruženje građana koji se bave planinarenjem i ekstremnim sportovima.

Služba za zaštitu i spašavanje sa visina vrši spašavanje stradalih i ugroženih ljudi i materijalnih dobara iz teško pristupačnih terena, podzemnih špilja, nepristupačnih kanjona, visokih zgrada i predjela zatrpanih lavinama.

6. **Služba za zaštitu bilja i biljnih proizvoda** formira se u kantonalnoj ustanovi "Poljoprivredni zavod USK-a".

Služba za zaštitu i spašavanje bilja i biljnih proizvoda vrši zaštitu svih vrsta bilja i biljnih proizvoda koja se odnosi na terensku i laboratorijsku dijagnostiku zaraznih, parazitnih i drugih štetočina i zagađivača, kao i zaštitu od radioaktivne, hemijske i biološke kontaminacije. Služba prati, istražuje, unapređuje i primjenjuje metode otkrivanja i suzbijanja zaraznih, parazitnih i drugih oboljenja bilja. Vršiti istraživanja i način zaštite od štetnih pojava štetočina i biljnih bolesti, te predlaže mjere zaštite i upotrebu preparata za zaštitu.

7. **Služba za zbrinjavanje ugroženih i stradalih** formira se u Organizaciji Crvenog križa USK-a. Služba za zbrinjavanje ugroženih i staradalih vrši prihvata, smještaj i obezbjeđuje ishranu stradalog i ugroženog stanovništva u slučajevima ratnih događanja i većih prirodnih i drugih nesreća kroz organizacije Crvenog križa općina.

8. **Služba za zaštitu od šumskih požara** formira se u ŠPD "Unsko-sanske šume" i Kantonalnoj upravi za šumarstvo.

Službe za zaštitu šuma od požara vrše preventivne poslove na zaštiti šuma od požara i sve druge poslove zaštite šuma od požara propisane Zakonom o šumama ("Sl. novine FBiH", broj 20/02 i 37/04) i Pravilnikom o sadržaju planova za zaštitu šuma od požara ("Sl. novine FBiH", broj 21/04).

Član 5.

Pored službi iz člana 4. ove Uredbe, Kantonalna uprava civilne zaštite (u daljnjem tekstu: Kantonalna uprava) može odrediti i druga pravna lica, udruženja građana i nevladine organizacije čija je djelatnost od značaja za zaštitu i spašavanje i s tim pravnim licima, udruženjima i organizacijama može zaključiti sporazum o načinu i uvjetima njihovog angažovanja na zadacima zaštite i spašavanja na području Kantona, koje time imaju status službe zaštite i spašavanja.

U sporazumu iz stava 1. ovog člana utvrđuju se prava i obaveze o međusobnim odnosima u angažovanju tih pravnih lica, udruženja i nevladinih organizacija na zadacima zaštite i spašavanja, kao i obaveze Kantonalne uprave prema tim pravnim licima, udruženjima i organizacijama koje se odnose na obezbjeđenje određenih finansijskih sredstava za nabavku opreme i drugih sredstava rada koja su potrebna za rad tih udruženja i organizacija na zadacima zaštite i spašavanja.

III - ZADACI NA FORMIRANJU, OPREMANJU, POPUNI I UPOTREBI SLUŽBI ZAŠTITE I SPAŠAVANJA

Član 6.

Rukovodioci pravnih lica, odnosno udruženja iz člana 4. ove Uredbe, u kojima se formiraju predviđene službe zaštite i spašavanja, u saradnji s Kantonalnom upravom vrše slijedeće poslove:

- 1) formiraju službu, određuju rukovodioca službe i broj pripadnika službe;
- 2) popunu službe vrše zaposlenicima koji se nalaze na radu u pravnom licu, odnosno članovima udruženja koji su obučeni i osposobljeni za vršenje poslova iz nadležnosti službe;
- 3) utvrđuju potrebe u opremi, tehničkim i drugim sredstvima rada koja su neophodna za rad službe zaštite i spašavanja i da preduzimaju mjere za obezbjeđenje te opreme i sredstava;
- 4) organizuju i provode obučavanje pripadnika službe za uspješno vršenje poslova zaštite i spašavanja iz nadležnosti službe;

5) u roku od šest mjeseci od potpisivanja ugovora iz člana 10. ove Uredbe, u obavezi su da izrade vlastite procedure rada za postupke djelovanja u slučajevima angažovanja na zadacima zaštite i spašavanja iz nadležnosti službe.

Član 7.

Službe zaštite i spašavanja iz člana 4. ove Uredbe poslove iz svoje nadležnosti vrše u fazi nastanka prirodne ili druge nesreće i u fazi otklanjanja i saniranja nastalih posljedica, a zadatke koji se odnose na preventivnu zaštitu ostvaruju u okviru obavljanja redovne djelatnosti u pravnom licu, odnosno udruženju u kojima su formirane.

Član 8.

U cilju stvaranja uvjeta da službe zaštite i spašavanja iz člana 4. ove Uredbe mogu vršiti poslove zaštite i spašavanja predviđene ovom Uredbom, Kantonalna uprava planirat će odgovarajuća sredstva u Budžetu Kantona, kao i dio sredstava iz posebne naknade za zaštitu i spašavanje koja pripadaju Kantonu prema članu 180. Zakona o zaštiti i spašavanju ljudi i materijalnih dobara od prirodnih i drugih nesreća (u daljnjem tekstu: Zakon o zaštiti i spašavanju) koja će se koristiti za nabavku opreme, tehničkih i drugih sredstava koja su neophodna za rad tih službi i za obučavanje i osposobljavanje njihovih članova koji obavljaju poslove iz nadležnosti službe zaštite i spašavanja.

Finansijska sredstva iz stava 1. ovog člana obezbjeđuju se samo za finansiranje onog dijela aktivnosti službi zaštite i spašavanja koje će one vršiti kao dio dodatne djelatnosti koja se odnosi na zaštitu i spašavanje ljudi i materijalnih dobara od prirodnih i drugih nesreća, koji su ovom Uredbom i ugovorom iz člana 10. ove Uredbe stavljeni u nadležnost tih službi.

Raspodjelu sredstava iz stava 1. ovog člana na pojedine službe zaštite i spašavanja, s podacima o vrsti i količini sredstava koja treba nabaviti vrši Kantonalna uprava na zahtjev organa i pravnih lica iz člana 4. ove Uredbe, a u okviru zadataka iz stava 2. ovog člana i u skladu s godišnjim programom razvoja, godišnjim finansijskim planom i godišnjim programom rada tih službi.

Član 9.

Pravna lica i udruženja iz člana 4. ove Uredbe u kojima su formirane službe zaštite i spašavanja, opremu i tehnička sredstva nabavljena iz sredstava član 8. ove Uredbe mogu koristiti za obavljanje svoje redovne djelatnosti, s tim da su dužni

obezbijediti efikasno funkcionisanje službi zaštite i spašavanja kada se naredi njihovo angažovanje, što se bliže uređuje ugovorom iz člana 10. ove Uredbe.

Član 10.

Kantonalna uprava će s pravnim licima i udruženjima iz člana 4. ove Uredbe zaključiti ugovor o međusobnim pravima i obavezama i utvrditi konkretne zadatke službi u pitanjima zaštite i spašavanja ljudi i materijalnih dobara od prirodnih i drugih nesreća, kao i način djelovanja službi kada Kantonalni štab donese naredbu o njihovom angažovanju na zadacima zaštite i spašavanja na području Kantona.

Zaključivanje ugovora iz stava 1. ovog člana vrši se onda kada Kantonalna uprava utvrdi da je pravno lice, odnosno udruženje, ispunilo uvjete iz člana 6. ove Uredbe, a pravno lice i udruženje koje ne ispuni te uvjete nema status službe zaštite i spašavanja.

Član 11.

Upotrebu službi zaštite i spašavanja iz člana 4. ove Uredbe na zadacima zaštite i spašavanja u uvjetima iz člana 7. ove Uredbe, te vrijeme i mjesto za njihovo djelovanje na području Kantona, naređuje Kantonalni štab, samoinicijativno ili na prijedlog Kantonalne uprave.

Kada Štab iz stava 1. ovog člana naredi angažovanje službi zaštite i spašavanja, rukovodioci pravnih lica i udruženja građana iz člana 4. ove Uredbe, u kojima su formirane službe zaštite i spašavanja, dužni su preduzeti sve potrebne mjere kojima će obezbijediti da službe pravovremeno dođu na mjesto određeno naredbom Štaba i da mogu vršiti zadatke iz svoje nadležnosti.

Izuzetno, u hitnim slučajevima, kada ne postoji mogućnost da se u što kraćem roku održi sjednica Kantonalnog štaba, angažovanje službi zaštite i spašavanja iz člana 4. ove Uredbe može da naredi komandant, odnosno načelnik Kantonalnog štaba, ako je komandant odsutan, o čemu je dužan blagovremeno obavijestiti komandanta tog štaba.

Službe zaštite i spašavanja iz člana 4. ove Uredbe angažuju se onda kada Vlada Kantona proglasi nastanak prirodne ili druge nesreće na području Kantona, a izuzetno, angažovanje tih službi može se izvršiti i prije proglašenja prirodne ili druge nesreće u slučaju kada prijeti neposredna opasnost od nastanka prirodne i druge nesreće u cilju preduzimanja odgovarajućih mjera na sprečavanju nastanka te opasnosti ili nesreće ili ublažavanja njihovog djelovanja.

Član 12.

Kantonalna uprava preduzimat će odgovarajuće aktivnosti na formiranju službi zaštite i spašavanja iz člana 4. ove Uredbe, njihovoj popuni ljudstvom i materijalno-tehničkim sredstvima, obučavanju i stručnom osposobljavanju i u tim pitanjima pružati odgovarajuću stručnu i drugu pomoć i starati se da službe budu osposobljene za vršenje zadataka za koje su formirane, a pravna lica i udruženja građana iz člana 4. ove Uredbe dužna su postupiti po zahtjevima Kantonalne uprave.

IV - FORMIRANJE SLUŽBI ZAŠTITE I SPAŠAVANJA U GRADU I OPĆINAMA

Član 13.

U skladu sa odredbom člana 123. stav 3. Zakona o zaštiti i spašavanju, općinski načelnik–gradonačelnik svojim aktom formira službe zaštite i spašavanja na prijedlog općinske službe civilne zaštite, koja će djelovati na području općine – grada.

Formiranje službi zaštite i spašavanja iz stava 1. ovog člana vrši se u skladu s potrebama koje su utvrđene u procjeni ugroženosti područja općine od prirodnih i drugih nesreća, kadrovskim i materijalnim uvjetima kojima raspolažu pravna lica i udruženja u kojima se formiraju te službe.

Član 14.

Službe zaštite i spašavanja općine mogu se formirati i u pravnim licima i udruženjima iz člana 4. ove Uredbe ako u tim pravnim licima i udruženjima postoje uvjeti za formiranje službi, s tim da se ne smije dovesti u pitanje organizacija i rad službe zaštite i spašavanja iz člana 4. ove Uredbe.

Član 15.

U općim aktima općinskog načelnika kojima se formiraju službe zaštite i spašavanja općine analogno se uređuju pitanja iz čl. 6. do 12. ove Uredbe.

V - PRIJELAZNE I ZAVRŠNE ODREDBE

Član 16.

Službe zaštite i spašavanja iz člana 4. ove Uredbe formirat će se u roku od tri mjeseca od dana stupanja na snagu ove Uredbe.

Član 17.

Kantonalna uprava dužna je pružiti odgovarajuću stručnu pomoć službama civilne zaštite općina na pravilnom i blagovremenom formiranju službi zaštite i spašavanja općine i grada iz čl. 13. i 14. ove Uredbe.

